

**Pembantu PMO pertahan Najib tidak saman WSJ menerusi Facebook
Malaysian Insider
Feb 24, 2016**

Pembantu di Pejabat Perdana Menteri (PMO) mendakwa isu membabitkan akta di Amerika Syarikat (AS) menyukarkan Perdana Menteri Datuk Seri Najib Razak mengambil tindakan undang-undang terhadap The Wall Street Journal (WSJ).

Menggunakan akaun Facebook bernama Yuktes Vijay, beliau menjelaskan Akta Ucapan yang diperkenalkan di AS pada 2010 menyukarkan tindakan undang-undang diambil terhadap WSJ.

Beliau juga menggunakan contoh kes saman bekas Presiden Singapura Lee Kuan Yew yang menang kes terhadap laman berita itu disebabkan akta berkenaan belum dikuatkuasakan ketika kes berjalan.

"Ada yang sebut kenapa Lee Kuan Yew boleh saman Wall Street Journal dan menang tetapi PM Najib Razak pula guna alasan kaedah dan spektrum undang-undang berbeza untuk tidak saman WSJ lagi.

"Speech Act iaitu akta yang menyulitkan niat PM untuk saman hanya dikuatkuasakan pada 2010.

"Kes saman terakhir Lee Kuan Yew pada 2008," katanya dalam posting Facebook yang dimuat naik kira-kira 3 jam sebelum ini.

Yuktes yang meletakkan pekerjaannya sebagai pembantu kepada kerajaan Malaysia juga berkata, alasan Lee memenangi kes itu kerana pejabat WSJ ada di Singapura juga tidak berasas.

Bagaimanapun, semakan yang dibuat di laman web Jabatan Perdana Menteri mendapati tidak ada nama pegawai Yuktes Vijay direkodkan di mana-mana bahagian dalam jabatan itu.

"Lee Kuan Yew dapat failkan saman dan menang bukan kerana WSJ ada pejabat di Singapura. Tiada asas atau pun logik alasan ini.

"Lee Kuan Yew failkan saman sebelum Speech Act diperkenalkan di mana kes terakhirnya difailkan pada 2008. Masa itu mana ada imuniti yang diberi Speech Act," katanya, memetik posting tersebut.

"Manakala Speech Act diluluskan pada 2010. Salah Najib jugalah WSJ fitnah selepas Speech Act diluluskan?"

Presiden AS Barrack Obama sebelum ini melalui kongresnya pada 2010 meluluskan akta berkenaan bagi melindungi penulis, ahli akademik, dan wartawan negara itu daripada dikenakan tindakan daripada negara lain.

Peguam Najib sebelum ini berkata beliau tidak akan memfailkan tuntutan saman fitnah terhadap WSJ di AS kerana beliau bukan personaliti terkemuka di negara itu untuk memperoleh nilai ganti rugi lebih tinggi.

Datuk Firoz Hussein Ahmad Jamaluddin yang turut berada dalam pasukan perundangan perdana menteri berkata, Najib bukan saja mahu keadilan untuk dirinya tetapi mahu mahkamah memberikan perintah ganti rugi kerana mencederakan reputasinya.

“Beliau (Najib) nampaknya tidak akan mendapat ganti rugi lebih tinggi di AS kerana beliau tidak begitu dikenali di sana,” katanya.

Firoz berkata Najib juga layak menerima ganti rugi sama seperti pemimpin pembangkang seperti Datuk Seri Anwar Ibrahim dan Lim Guan Eng yang dianugerahkan jumlah pampasan kewangan lebih tinggi terhadap Utusan Melayu (Malaysia) selepas ia didapati benar memfitnah mereka.

Julai lepas, WSJ melaporkan aliran tunai sebanyak RM2.6 bilion ke dalam akaun peribadi Najib melalui entiti berkaitan 1Malaysia Development Bhd (1MDB), memetik dokumen hasil siasatan pasukan petugas khas lantikan Putrajaya.

Akhbar itu juga mengeluarkan rencana mengenai perkara itu.

Najib menafikan mengambil dana 1MDB bagi kegunaan peribadi tetapi masih belum bertanggungjawab ke atas wang tersebut.

Dana itu, sebahagian besar dimasukkan sebelum pilihan raya umum pada Mei 2013, disifatkan Suruhanjaya Pencegahan Rasuah Malaysia (SPRM) sebagai derma politik.

Najib mengeluarkan arahan menyaman WSJ awal Ogos tahun lepas, selepas SPRM memberitahu wang itu datang dari penderma dan bukannya dari 1MDB.

Penghujung Julai lepas, WSJ enggan memberikan maklum balas kepada permintaan peguam Najib yang meminta penjelasan sama ada laporan akhbar itu mengenai akaun Najib bermaksud mereka menuduh perdana menteri menyalahgunakan kuasa.

Akhbar itu sebaliknya mempertahankan laporan mereka bertarikh 2 Julai, dan rencana susulan menyentuh isu itu diterbitkan pada 6 Julai, yang mengatakan laporan itu jelas dan berasaskan kertas siasatan pasukan penyiasat Malaysia. – 24 Februari, 2016.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/pembantu-jelas-di-facebook-kenapa-najib-tidak-saman-wsj>